

ղաքների բնակիչներն են: Երեւանը, որ ամենաշահաւոր քաղաքն է, ունի 11,463 բնակիչ, Նախիջևեանը՝ 2599 բնակիչ, Օրտուբաթը, որ նոր քաղաք է, 3444 բնակիչ: Երկրագործ ընտանիքների թիւն է 24,906, բոլոր երեք երկրամասերում: Վաչկատունները (նոմադ), որոնց թիւը առաջ 2,684 ընտանիք էր կազմում, այժմ իջել է 847 ընտանիքի: Այսպիսով՝ երկրագործութիւնը շատ կարեւոր չափերով յետ է մղել վաչկատուն կենցաղավարութիւնը. մի պարագայ, որ արտակարգօրէն օրհնաբեր յառաջադիմութիւն է երաշխիք պէտք է սեպել հայոց աշխարհի քաղաքակրթութեան զարգացման համար: Այս երկրամասի վրայ առաջ ապրող վաչկատուն բրդերը չուել են դէպի Պարսկաստան: Նրանց փոխարէն եկել են վերոյիշեալ 67 եզիտի ընտանիքները: Եւ որովհետեւ այդ արտագաղթած վաչկատունները երկրի համար մօտ 15,000 հոգու կորուստ են ներկայացնում, ուստի եւ այդ թիւը հանել պէտք է ներգաղթածների 57,226 թուից, որով ազգաբնակչութեան յաւելումը ըստ Շոպէնի, ընդամէնը 46,000 շունչ հաշուելու է:

«Նախկին բնակիչները 10,413-ը քուրդ էին, Ղազար» — 8445, Այրումլի — 6807, Թաթար — 1935 շունչ, ապա՝ մօտ 200 ընտանիք մուղանլի եւ այլ փչրանքներ ցեղային ուրիշ մնացորդների, որոնց թուին հաշուելու են նաեւ քեանդեառլին՝ Նախիջևեանի երկրամասում, ընդամէնը 6473 շունչ: Իրանք աչքի են ընկնում կապոյտ աչքերով եւ խարտեաչ մազերով: Գնչուներ, որոնք մասամբ քրիստոնեայ են (այստեղ բոշա են կոչուում) եւ մասամբ մահմետական, հաշուում էին մօտաւորապէս 50 ընտանիք քրիստոնեայ, 212 շնչով, 107 ընտանիք էլ մահմետական, 300 շնչով: Նշանակում է՝ բոլոր գնչու ընտանիքների թիւն է 157, ընդամէնը 518 շնչով:

Վերոյիշեալ վիճակագրական տեղեկութիւններին, որոնք Վազների գրքին կցուած «յաւելում»-ի առաջին հատուածն են կազմում եւ «ուսական Հայաստանի բնակչութիւնը»

\* Շփոթելու չէ կազակների (Kosak) հետ: «Ղազար» Թաթարական ցեղային հատուած է, ինչպէս եւ միւսները:

վերնագիրը կրում (էջ 235-238), հետեւում է մի երկրորդ հատուած (էջ 239-250), որ ունի «Հայերի արտագաղթերը եւ նրանց ցրումը հին աշխարհում» վերնագիրը, եւ ուր հեղինակը մի համառօտ ակնարկ է նետում մեր հայրենիքի պատմական դժբախտ ճակատագրից բխող այդ — արտագաղթի — երեւոյթի վրայ, սկսած հնագոյն ժամանակներից մինչեւ այդ օրերը:

Որչափ եւ ինքնին հետաքրքիր են հայ գաղութների մասին Վազների գրած էջերը, բայց առանձին նորութիւն չեն պարունակում, ուստի եւ կանգ առնել չենք կարող նրանց վրայ: Ուրիշներին ենք թողնում զբաղուել նաեւ այն հարուստ տեղեկութիւններով, որ Վազների աշխատութեան մէջ տալիս է Հայաստանի բնութեան մասին ընդհանրապէս եւ նրա կենդանական ու բուսական աշխարհի շուրջը մասնաւորապէս: Իր գրքին կցուած յաւելումով երրորդ եւ ընդարձակ հատուածը եւս (էջ 251-331), որ կրում է «Հետազոտութիւններ Հայկական բարձրաւանդակի բնապատմութեան մասին» վերնագիրը, նուիրուած է նոյն այդ խնդիրներին:

Ինչպէս իր գրքի յառաջաբանի վերջում, այնպէս նաեւ այդ հատուածի ծանօթութեան մէջ Վ. ասում է, որ մտադիր է Հայաստանի բնապատմութեանը մի առանձին եւ միայն մասնագէտ ընթերցողների համար սահմանուած ուսումնասիրութիւն հրատարակելու:

\* \* \*

Այժմ վերադառնանք Վազների ճամբորդութեանը դէպի Հայաստան, Արովեանի ուղեկցութեամբ, ու մտովին հետեւինք նրանց քայլերին:

Մեր ուղեւորների ճամբան Թիֆլիսից Երեւան ընկնում է Իրիլջանի եւ Սեւանի վրայով: Առաջին օրը նրանք գիշերում են Թիֆլիսից ոչ հեռու գտնուող Կօղի գիւղում: (Տեղափոխութեան միջոցը փոստային սայլակն է եղել: Բացի Արովեանից՝ Վ. ունեցել է եւ մի ուրիշ ուղեկից, Բարոն Հ-Գ): Երկրորդ օրը, զիմեւով դէպի հարաւ, անցել են Ալգեսն եւ Խրամը, որից յետոյ նրանց առջեւ բարձրացել է Լալվար սարը, որի ստորոտում այն ժամանակ էլ մշակուում էր պղնձի հանքը (Լօսիի,